

No-Return-Blues

*Musikalischer Kommentar zur Taktik der S21-Bauer: „Strategie des Faktenschaffens“
Pit Bäuml, Januar 2019*

Sia grabet ond sia bauet
ond fanget alles o
a Millionle Euro hier,
a Millionle do
ond wenn gnuag Geld verbuddelt -
des isch dr alte Trick -
soll's au dr letschte glauba:
jetz ko mr nemme zrick!
Des sei dr Point of no return
des verzählet se ons görn.

Ond an hondert Stelle
fangt mr amol o
schnell, schnell weiterbaue
notfalls ohne Plo.
Zwar wird's no emmer teirer -
Hauptsach dr Gegner resigniert!
Oifach weiter, dass es
dr Letschte no kapiert:
des sei dr Point of no return
des verzählet se ons görn.

Des sei dr Point of no return,
no return mit viel Beton.
Des sei dr Point of no return,
für feine Spekulation.
Des sei dr Point of no return,
drom weiter Schritt om Schritt.
Des sei dr Point of no return,
net zrick fir da Profit.
Des sei dr Point of no return,
des verzählet se ons görn.

Rock:

Ja haltet dia ons denn fir bled on domm?
Mir sehet doch, was los isch om ons rom:
Mir sollet zahla – ond dia sahn ab!
Drom nehmet mir da Besa jetz selber en d'Händ
on zoiget deane oba, dass mir stärker sent
Mit Schaufel ond mit Kehrwisch wird jetz z'sammakehrt
der kapitale Schrott, wo iberall romfährt.

Mir protestieret weiter ond wellet nemme z'rick
no return, au net a Stick
Mir kommet emmer wieder gern von nah ond fern
verzählet deane emmer wieder gern:
**mit Protestiere net aufhörn
isch onser Point of no return. (2x)**